

7. maj 2010

UPA 2010/118

**Uunga siunnersuut: Inatsisartut peqqussutaat nr. Xx.xx 2010-meersoq
pisortanit ikiorsiissutit pillugit Inatsisartut peqqussutaata
allanngortinneqarnera.**

(Illerfiillu angallanneqartarneri kiisalu pisortanit ikiorsiissutinik tunniussisarnermi
piumasaqaatit erseqqissaavigineqarneri)

(Isumaginninnermut Naalakkersuisumit saqqummiunneqartoq)

pillugu

Ilaqutariinnermut Ataatsimiititaliap

ISUMALIUTISSIISSUTAA

Siunnersuutip aappassaaneerineqarnerani saqqummiunneqartoq

Ilaqutariinnermut Ataatsimiititaliap kingullermik suliarinninnermini ukuninnga
inuttaqarpoq:

Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Jane Petersen, Inuit Ataqtigiit
Inatsisartunut ilaasortaq Andreas Uldum, Demokraatit
Inatsisartunut ilaasortaq Ruth Heilmann, Siumut
Inatsisartunut ilaasortaq Knud Kristiansen, Atassut

Siunnersuut aammalu ulloq 15. april 2010 UPA 2010-mi ingerlanneqartumi
siunnersuutip siullermeerneqarnerani Ilaqutariinnermut Ataatsimiititaliamit
sukumiisumik misissorpaa.

Siunnersuut pillugu

Aalajangiiffigisassatut siunnersuutip UKA 2007/123-p Inatsisartunit UKA 2007-imi
akuersissutigineqarnera siunnersuutip saqqummiunneqarneranut

tungavigineqarpoq, pisortanit ikiorsiissutit pillugit maleruaqqusat malillugit illerfinnik angallassinermut aningaasartuutitik matussusiinissamut kommunit periarfissaqarput. Tamatuma kingorna siunnersuut oqaatsitigut erseqqissaassummik imaqarpoq, taanna malillugu inatsimmi § 8, imm. 1-ip danskisut kalaallisullu oqaasertai imminnut naapertuuttungortinneqarlutik.

Taamaalilluni siunnersuummi matumani pineqartumi pingaarnertut imarisaasoq tassaavoq inatsiliortut siusinnerusukkut aalajangigaannik atuutsitsilerneq, taamaannerani kissaatigineqarluni pisortanit ikiorsiissutit pillugit maleruaqqusat iluini illerfinnik assartuinnermut aningaasartuutitik matussusiinissamut kommunit aningaasatigut killissaareersut iluini periarfissaqarnissaat.

Inatsisartut Inatsisissaannik Nalilersuisarfimmit allakkiaq tungavigalugu siunnersuutaqqaartoq saqqummiunneqarpoq aammalu siullermeerinissaq sioqqullugu siunnersuummut iluarsiissummik tunniussisoqarluni.

Siunnersuutip tusarniaassutigineqarnera

Siunnersuut oqartussaasunut susassaqtunut tusarniaassutigineqarpoq. KANUKOKA-mit tusarniaanermut akissutigineqartumi isornartorsiuisunik oqaaseqaaseqaatitaqarpoq. Toqusup najukkaminut utertinneqarnissaanut peqqinnissaqarfik aningaasaqarnikkut akisussaasariaqartoq KANUKOKA-mit oqaatigineqarpoq.

Siunnersuummik siullermeerinninneq

Siunnersuut ulloq 15. april 2010-mi siullermeerneqarpoq, tamatumani partiit gruppii Inatsisartunullu ilaasortat tamarmik siunnersuummut oqaaseqaateqarnissaminnut periarfissaqarlutik.

Ilaqutariinnermut Ataatsimiititaliamit apeqquteqaat

Siunnersuut pillugu apeqqutitik marlunnik saqqummiussinissaq Ilaqutariinnermut Ataatsimiititaliap pisariaqarsoraa. Tamatumani illerfinnik assartuinnermut assigisaannillu peqqinnissaqarfiup inatsisillu allat, isumaqatigiissutit periutsillu iluini qanoq ikiuuttoqarnissaa eqqarsaatigalugu. Apeqqutit akissutillu isumaliutissiissummummatumunnga ilanngussatut ilanngunneqarput.

Ilaqutariinnermut Ataatsimiititaliap oqaaseqaatai

Siunnersuut manna Ilaqutariinnermut Ataatsimiititaliamit ilassilluarneqarpoq. Inatsisartut siusinnerusukkut peqqussutaata 2007-imeersup atorunnaarsinneratigut toqusup qimatai illerfimmik assartuinnermut akiliinissaminnut periarfissaqanngitsut inuunermi atukkamik ilungersunartorujussuarmik inissimatilerneqarput.

Tamatumani illerfinnik assartuinnermut aningaasartuutunik matussusiinissamut periarfissap tamakkiisumik atorunnaarsinneratigut.

Toqusoq imminut pilersorsinnaanngitsoq aammalu pisortanit ikiorsiissutit pillugit maleruaqqusat atuuttut iluini piginnaatitaasoq illerfimmik assartuinnermut aningaasartuutunik matussusiinissamut annikitsuinnarmik periarfissinneqartoq Ilaqutariinnermut Ataatsimiititaliaq isumaqarpoq.

Pisortanit ikiorsiissutit pillugit Inatsisartut peqqussutaanni atuutereersumi § 23, imm. 1-imut atatillugu siunnersuut isigineqassaaq, tamatumani ilisinermi aningaasartuutit naammaginarumik matussuserneqarnissaannut periarfissaqareerluni.

§ 23. Kommunalbestyrelsi ilisinermut aningaasartuutitut naleqquttunut matussutissanik pisortanit ikiorsiisinnaavoq, aningaasartuutit pigisanit akilerneqarsinnaasimangippata toqusullu piumasaqaatit § 4-mi imm. 1 naammassisimappagu.

Aammattaaq illerfinnik assartuinissamut periarfissaq pisortanit ikiorsiissutit pillugit maleruaqqusani maleruagassiornissaat Ilaqutariinnermut Ataatsimiititaliamit naleqquttutut isigineqarpoq, taamaalilluni kommunit taamaalillutillu innuttaasut assigiimmik maleruagassiuunneqarlutik.

Toqusoq danskisut innuttaassuseqanngitsoq aammalu Kalaallit Nunaanni aalajangersimasumik najugaqanngitsoq innuttaasullu nalunaarsorsimaffianni allasimangitsoq maleruaqqusanut ilaatinneqarnissamut periarfissaqanngilaq. Taakku assersuutigalugu tassaasinnaapput angerlarsimaffeqanngitsut aallallu innuttaasut nalunaarsorsimaffianni nalunaarsorneqarsimangitsut. Siunnersuutip matuma aappassaaneerneqarnissaanut atatillugu Kalaallit Nunaanni angerlarsimaffeqanngitsut innuttaasut nalunaarsorsimaffiannut qanoq nalunaarsorneqartarnersut pillugu nassuiaateqaqqullugu Naalakkersuisunut ilaasorta qinnuigineqarpoq.

Siunnersuummi saqqummiunneqartumi sanngeequtaasoq tassaavoq inatsisit allat assigisaat atuuttullu, isumaqatigiissutit periutsillu nassuiaatini nassuiaatigineqanngillat. Tamanna pissutigalugu taakku pillugit Ilaqutariinnermut Ataatsimiititaliaq marlunnik apeqquteqarnissaminut pissutissaqalerpoq.

Maleruaqqusat isumaqatigiissutilluunniit allat illerfinnik assartuinnermut tapiissutunik matussusiippata siunnersuummi maleruaqqusat atorneqarsinnaanngitsut Ilaqutariinnermut Ataatsimiititaliamit oqaatigineqassaaq. Tamanna pisortanit ikiorsiissutit pillugit inatsisartut peqqussutaanni § 4, imm. 2-mi aalajangersakkamut atuuttumut naapertuulluni, taanna malillugu *pisortanit ikiorsiissutunik tunniussisoqarsinnaavoq, pisariaqartitsineq ikiorsiissutit allat atorlugit pisinnaanngikkaangat.*

Inassuteqaat

Oqaatigineqartut tunngavigalugit siunnersuut ilusimisut iluseqartoq akuerineqassasoq ataatsimiititaliamit isumaqatigiittumit **inassutigineqarpoq**.

Taama oqaaseqarluni Ilaqutariinnermut Ataatsimiititaliap siunnersuut aappassaaniigassanngortippaa.

Debora Kleist
Siulittaasoq

Jane Petersen

Andreas Uldum

Ruth Heilmann

Knud Kristiansen

[Ilanngussaq 1](#)

[Ilanngussaq 2](#)